

Inatsisartuni aalajangiiffigisassaattut siunnersuut Naalakkersuisut kingusinnerpaamik 2017-imi aningaasaateqarfimmik 4 mio koruunit tikillugit aningaasaateqartumik pilersitsinissamik saqummiussissasut, aningaasaateqarfiup aningaasalersussallugu angajoqqaat kisermaat 180.000 koruunilluunniit ataallugit isertitalit meeraasa nunatsinni nunattalu avataani angalasarnissaat.

(Inatsisartunut ilaasortaq Agathe Fontain, Inuit Ataqtigiit)

Akissuteqaat

(Ilaqutariinnermut, Naligiissitaanermut, Isumaginninnermut Inatsisinillu atuutsitsinermut Naalakkersuisoq)

1. Siullermeerneqarnera

Siunnersuummut qujavunga.

Meeqqat alapernaatsuunissaanik kaammattortuarnissaasa meeqqallu misigisassaqartittuarnissaasa pingaartuunerat Naalakkersuisut isumaqatigaat, tamakkumi aqutigalugu inuttut ineriartoqqissinnaasarmata.

Periutsit assigiinngitsut atorlugit meeqqat alapernaatsunngortinneqarlutillu misigisassaqartinneqarsinnaapput. Meeqat inussuttullu ulluunerani paaqqinnittarfiit, atuarfiit sunngiffimmi sammisassaqartitsiviit inuussuttunullu ilinniarfiit aqutigalugit inuiaqatigiittut kaammattortarpagut, soorluttaaq illoqarfinni nunaqarfinnilu peqatigiiffippassuaqartoq assigiinngitsunik neqerooruteqartartunik.

Pinngortitarsuarput alutornartoq meeqqanit tamanit ajornanngitsumik tikinneqarsinnaavoq nuannersunillu atorluarsinnaasaminnik misigisaqarfisarlugu.

Ilaqutariit tamarmik ajunngitsumik inuuneqarnissaat inuiaqatigiittut annertuumik soqutigisaraarput. Ilaqutariit pissutsit assigiinngitsut patsisigalugit pitsaanngitsumik atugaqartut ajornartorsiuteqartulluunniit soorlu persuttaasarnernik, atonerluinernik aningaasaqarnikkulluunniit ajornartorsiuteqartut ikiorneqarnissamik tapersersorneqarnissamilluunniit neqeroorfigineqartussaapput. Ikorsiinerit tapersersuinerilluunniit ilaqutariinnut ataasiakkaanut naleqqussakkat. Taamaaliortarpugullu, innuttaasut tamarmik ajunngitsumik atugaqarnissaat inuiaqatigiittut kissaatigalugulu akisussaaffigigatsigu - meerartagullu inuiaqatigiinni pisuussutitta annerpaartarimmassuk.

Inoqutigiit isertittagaat annikissimappata nunatsinni nunanulluunniit allanut sulinngiffeqarluni angalaniarnissamat aningaasassaqarniarnissaq ajornartorujussuusinnaavoq.

Naalakkersuisooqatigiinnissamik isumaqatigiissummi allaqqavoq isumaginninnikkut ikorsiissutaasartut assigiinngitsut Naalakkersuisut aaqqissuuteqqinniaaraat, pensioninullu tungasut aaqqissuuteqqinneqareerlutik. Pisortat ikorsiissutigisartagaat meeqqanullu tapit aaqqissuunissaat aallartinneqalerpoq. Naalakkersuisut aaqqissuusseqqinneranni siunertarineqartoq ataasiusoq tassaavoq isumaginninnikkut ikorsiissutaasartut innuttaasut minnerunngitsumillu pissakinnerusut pisariaqartitaanut naleqqussarneqarnissaat.

Pisortat ikorsiissutigisartagaasa meeqqanullu tapit aaqqissuuteqqinnissaani ilaqutariit isertitakitsut minnerunngitsumillu meerartallit aningaasaqarniarnerisa pitsannorsaaffigineqarsinnaanerintu periarfissat ilaatigut misissorneqassapput, taamaasiornikkut ilaqutariit tamakku naammaginartumik

atugassaqalernissaat ilaatigut sulinngiffeqarlutik angalasalernissamut periarfissaqalersinnaanissaat siunertaralugu.

Aningaasaateqarfimmik pilersitsinissamik siunnersuutigineqartoq pisortat allaffissornerulerneranik kinguneqassaaq isumaginnikullu ikiorsiissutaasartut assigiinngitsut siunertarineqanngikkaluartumillu tamakku ataqatigiissikkuminaalineranik kinguneqarsinnaalluni. Tamatuma saniatigut SIK-ip ataanni sulinngiffeqarnissamut aningaasaateqarfimmik pilersitsisoqareernikuuvoq, taannalu aqputigalugu sulinngiffeqarnissamut aningaasanik qinnuteqartoqarsinnaalluni.

Qulaani oqaatigineqartut tunngavigalugit Naalakkersuisut inassutigaat siunnersuut itigartinneqassasoq.